

四庫全書

史部

欽定四庫全書

欽定續通志卷五十八

元紀二

世祖一

世祖皇帝諱呼必賚憲宗同母弟也帝仁明英睿事太后至孝尤善撫下當在潛邸思大有為於天下延藩府舊臣及四方文學之士問以治道憲宗以帝最親而賢故盡屬以軍國庶事命南駐扎固圖之地初太宗立軍

儲所於新衛以收山東河北丁糧後惟計直取銀帛軍  
行則以資之帝請設官築五倉於河上始令民入粟宋  
遣兵攻虢之盧氏河南之永寧衛之八柳渡帝請立經  
略司于汴以莽格史天澤楊惟中趙璧為使陳紀楊果  
為參議俾屯田唐鄧等州授之兵牛敵至則禦敵去則  
耕仍置屯田萬戶於鄧完城以備之歲壬子奉命帥師  
征雲南尋受京兆分地奏割河東解州鹽池以供軍食  
立從宜府於京兆屯田鳳翔募民受鹽入粟轉漕嘉陵

立京兆宣撫司以布琳及楊惟中為使闕隴大治歲癸  
丑出師臨洮分三道以進帝由中道過大渡河經行山  
谷間二千餘里至金沙江乘草囊以渡遂進薄大理城  
先是大理主段氏微弱國事皆決於高祥高和兄弟至  
是祥率衆遁去命大將伊克及巴圖爾追斬之留大將  
烏蘭哈達戍守以劉時中為宣撫使與段氏同安輯大  
理遂班師歲丙辰命僧子聰卜地於桓州東灤水北城  
開平府經營宮室又奉命益懷州為分地歲丁巳入覲

於伊克德呼蘇之地議分道攻宋以明年為期歲戊午冬十一月戊申禡牙於開平東北是日啓行歲己未秋七月師次汝南命大將巴圖爾等前行備糧漢上戒諸將毋妄殺命楊惟中郝經宣撫江淮筆且齊孫貞督軍須蔡州八月丙戌渡淮辛卯入大勝關宋戍兵皆遁辛丑進次江北九月壬寅朔親王穆格自合州釣魚山遣使以憲宗凶問來告且請北歸以繫天下之望帝曰吾奉命南來豈可無功遽還甲辰登香鑪山俯瞰大江

北曰武湖湖之東曰陽羅堡其南岸即澣黃洲宋以大  
舟扼江渡帝遣兵奪二大舟是夜遣瑪拉噶齊張文謙  
等具舟楫乙巳遲明至江岸風雨晦冥諸將皆以為未  
可渡帝不從遂申敕將帥揚旗伐鼓三道並進天為開  
霽與宋師接戰者三殺獲甚衆逕達南岸丁未駐澣黃  
洲庚戌圍鄂攻之逾月宋人城守益堅冬十一月丙辰  
移駐牛頭山時先朝諸臣阿勒達爾輝塔哈托果斯托  
里齊等謀立額呼布格額呼布格者睿宗第七子帝之

弟也皇后聞之急遣托歡額默根馳至軍前密報帝請  
速還丁卯發牛頭山聲言趨臨安留大將巴圖爾等率  
諸軍圍鄂閏月庚午朔還駐青山磯辛未臨江岸遣張  
文謙往諭諸將曰遲六日當去鄂退保澣黃洲宋宰相  
賈似道遣宋京請和命趙璧等語之曰汝以生靈之故  
來請和好意甚善然我奉命南征豈能中止果有事大  
之心當請於朝是日大軍北還

中統元年春三月戊辰朔車駕至開平親王哈坦阿濟

格率西道諸王塔齊爾額森克呼魯古爾卓多率東道諸王皆來會與諸大臣勸進帝三讓諸王大臣固請辛卯帝即皇帝位夏四月戊戌朔立中書省以王文統為平章政事張文謙為左丞辛丑以即位詔天下丁未以翰林侍讀學士郝經為國信使翰林待制何源禮部郎中劉人傑副之使於宋乙丑徵諸道兵六千五百人赴京師宿衛置互市於漣水軍禁私商不得越境犯者死是月額呼布格僭號於和琳城西阿勒坦河五月丙戌



建元中統甲午以額呼布格反詔赦天下乙未立十路  
宣撫使徵諸路兵三萬駐燕京近地六月戊戌以李璫  
為江淮大都督劉太平等謀反事覺伏誅高麗國王王  
佖遣其子永安公禧判司宰事韓即來賀即位以國王  
封冊玉印及虎符賜之秋七月癸酉以燕京路宣慰使  
瑪穆特行中書省事燕京路宣慰使趙壁平章政事張  
啓元參知政事王鶚翰林學士承旨兼修國史河南路  
宣撫使史天澤兼江淮諸翼軍馬經略使丙子詔造中

統元寶交鈔立互市於潁州光化軍宋兵攻邊城詔遣  
太尹竒味孟古岱率所部合兵擊却之帝自將討額呼  
布格八月己酉立秦蜀行中書省以京兆等路宣撫使  
廉希憲為中書省右丞行省事宋兵臨漣州李璫乞遣  
將益兵渡淮攻宋以方遣使修好不從癸亥以澤潞二  
州早賑之九月壬午初置拱衛儀仗冬十月癸丑初行  
中統寶鈔戊午車駕駐錫衮之地命給官錢雇在京橐  
駝運米萬石輸行在所十一月戊子發常平倉賑益都

濟南濱棗饑民十二月丙申以禮部郎中孟甲禮部員外郎李文俊使安南大理乙巳帝至自和琳駐蹕燕京近郊始制祭享太廟祭器法服以梵僧帕克斯巴為帝師授以玉印統釋教立仙音院復改為玉宸院括樂工立儀鳳司又立符寶局及御酒庫羣牧所

二年春正月乙酉宋兵圍漣州己丑李璿擊敗之二月己亥宋兵攻漣水命阿珠等率兵赴之丙午車駕如開平詔減民間差發罷守隘諸軍丁巳李璿破宋兵於沙

湖堰三月壬戌朔日有食之夏四月丙午詔軍中所俘  
儒士聽贖為民乙卯命宣撫司官勸農桑抑游惰禮高  
年問民疾苦舉文學才識可以從政及茂才異等列名  
上聞以聽擢用其職官汙濫及民不孝悌者量輕重議  
罰五月乙丑遣崔明道李全義為詳問官詣宋淮東制  
司訪問國信使郝經等所在仍以稽留信使侵擾疆場  
詰之庚辰敕使臣及軍士所過城邑官給廩餼毋擾於  
民丁亥申嚴沿邊軍民越境私商之禁禁私殺馬牛以

河南經略宣撫使史天澤為中書右丞相河南軍民並聽節制詔成都路置惠民藥局六月戊戌詔諭十路宣撫司并管民官定鹽酒稅課等法癸卯以嚴忠範為東平路行軍萬戶兼管民總管仍諭東平路達魯噶齊等官並聽節制乙卯詔宣聖廟及管內書院有司歲時致祭月朔釋奠禁諸官員使臣軍馬毋得侵擾褻瀆丙辰以汪良臣同簽鞏昌路便宜都總帥凡軍民官並聽良臣節制庚申宋瀘州安撫使劉整舉城降以整行夔府

路中書省兼安撫司佩虎符仍諭都元帥耨埒等存恤  
其民罷金銀銅鐵丹粉錫碌坑冶所役民夫及河南舞  
陽董戶藤花戶還之州縣賜大理國主段實虎符優詔  
撫諭之命李璫領益州路鹽課出工局繡女聽其婚嫁  
高麗國王佉更名植遣其世子愷奉表來朝以布哈為  
中書右丞相耶律鑄為中書左丞相張啓元為中書右  
丞秋七月辛酉朔立軍儲都轉運使司癸亥立翰林國  
史院以右丞相史天澤監修國史左丞相耶律鑄平章

政事王文統監修遼金史辛巳詔許衡即其家教懷孟  
生徒巳丑諭將士伐宋八月丁酉諭開平守臣釋奠於  
宣聖廟戊戌以燕京等路宣撫使蹇音諤德齊為平章  
政事辛丑以宣撫使鈕祜祿納罕為中書右丞庫庫為  
中書左丞丁未以姚樞為大司農甲寅詔諸王妃公主  
駙馬非聞奏不許擅取官物頒斗斛權衡宋私商七十  
五人入宿州詔宥之還其貨聽權場貿易仍檄宋邊將  
還北人之留南者九月庚申朔奉遷祖宗神主於聖安

寺丙寅詔以鈕祜祿納罕行中興府中書省戊辰大司  
農姚樞請以儒人楊庸教孔顏孟三氏子孫東平府詳  
議官王鏞兼充禮樂提舉詔以庸為教授以鏞特兼太  
常少卿辛未置和糴所於開平丙子諭諸王駙馬凡民  
間詞訟無得私自決斷皆聽朝廷處置敕今歲田租輸  
沿河近倉官為轉漕毋勞民癸未立諸路提舉學校官  
冬十月庚寅朔帝自將討額呼布格庚子以右丞張啟  
元行中書省於平陽太原等路修燕京舊城命平章政



事趙璧左三部尚書克呼木率蒙古漢軍駐燕京近郊以河南屯田萬戶史權為江漢大都督甲辰宋兵攻瀘州劉整擊敗之十一月壬戌與額呼布格遇於實默圖淖爾之地諸王哈坦等奮擊大破之額呼布格北遁癸酉駐蹕特默哈喇之地以尚書克呼木平章趙璧兼大都督率諸軍從塔齊爾北上分蒙古軍為二克呼木從穆蘇出居庸口駐宣德德興府諾海從阿固岱出古北口駐興州帝親將諸萬戶漢軍及武衛軍由檀順州駐

潮河川敕官給芻糧毋擾居民罷十路宣撫司止存開  
元路十二月庚寅封子珍戩為燕王領中書省事甲午  
師還詔撤所在戍兵放民間新簽軍命太常少卿王鏞  
教習大樂

三年春正月癸亥修宣聖廟成庚午罷高麗互市賜高  
麗國厯辛未禁諸道戍兵及勢家縱畜牧犯桑棗禾稼  
者癸酉以軍興人民勞苦敕停公私逋負毋徵丙戌命  
備宮懸鐘磬樂舞簫翟二月己丑李璫反以連海三城

獻於宋庚寅宋兵攻新蔡辛卯定中外官俸命大司農  
姚樞講定條格甲午李璫入益都辛丑李璫寇蒲臺癸  
卯詔發兵討之以趙壁為平章政事甲辰發諸蒙古漢  
軍討李璫命水軍萬戶解成張榮實大名萬戶王文幹  
及萬戶嚴忠範會東平濟南萬戶張宏歸德萬戶邱浹  
武衛軍礮手元帥薛軍勝等會濱棣丙午命諸王哈必  
齊總督諸軍以布扎爾額布根及趙壁行中書省事於  
山東宋子貞參議行中書省事以董源高逸民為左右

司郎中許便宜行事真定順天河間平灤大名邢州河  
南諸路兵皆會濟南己酉王文統坐與李壇同謀伏誅  
仍詔諭中外壬子李壇入濟南癸丑詔大名洺滋彰德  
衛輝懷孟河南真定邢州順天河間平灤諸路皆籍兵  
守城宋兵攻滕州三月己未括穆蘇愛滿輝和爾雅爾  
喀幹達實愛滿等戶丁為兵徙弘州錦工繡女于京師  
詔以平章政事滿拉廉希憲叅政商挺斷事官麥肖行  
中書省于陝西壬申命戶部尚書劉肅專職鈔法癸酉

命史樞阿珠各將兵赴濟南遇李璫軍邀擊大破之璫  
退保濟南乙亥宋將夏貴攻符離戊寅萬戶韓世安率  
鎮撫馬興千戶張濟民大破李璫兵于高苑禁民間私  
藏軍器乙酉宋夏貴攻蘄縣夏四月丙戌朔大軍圍濟  
南丁亥詔博興高苑等處軍民嘗為李璫脅從者竝釋  
其罪庚子詔安輯徐邳民禁征戍軍士毋縱畜牧傷其  
禾稼桑棗癸卯宋兵攻亳州乙卯詔右丞相史天澤專  
征諸將皆受節度五月戊午蘄縣陷權萬戶李義千戶

張好古死之庚申築環城圍濟南甲子宋兵攻利津縣  
蠲濱棣今歲田租之半東平十之三戊辰以左丞相和  
爾布哈兼中書省都斷事官甲申大司農姚樞辭赴省  
議事帝勅留之命樞與左三部尚書劉肅依前商議中  
書省事六月乙酉朔宋兵攻滄州戊子濱棣安撫使韓  
世安敗宋兵于濱州丁河口壬子申嚴軍官及兵伍擾  
民之禁秋七月戊午復蒙古軍站戶差賦農民包銀徵  
其半得戶止令輸絲民當輸賦之月毋徵私債甲戌李

壇伏誅體解以徇八月己丑郭守敬請開玉泉水以通漕運廣濟河渠司王允中請開邢洺等處漳滏澧河達泉以溉民田並從之丙午立諸路醫學教授戊申敕王鶚集廷臣商榷史事九月戊午亳州萬戶張弘略破宋兵于蘄縣復宿蘄二城以待衛親軍都指揮使董文炳兼山東路經略使收集益都舊軍充武衛軍戍南邊癸酉都元帥庫庫岱卒于軍以其兄阿珠代之閏月己丑以濟南民饑免其租稅及諸路軍戶他徭庚子中翼千

戶玖珠破宋兵于虎腦山庚戌發粟三十萬賑濟南饑  
民冬十月庚申分益都軍民為二董文炳領軍薩奇蘇  
治民詔以李壇所掠民馬還其主以郝經劉人傑使宋  
未還廩其家乙丑詔禁京畿畋獵丙寅分東西兩川都  
元帥府為二以托迪及劉整等為都元帥及左右副都  
元帥庚午敕鞏昌總帥汪惟正撤戍青居山軍屯田利  
州乙亥分中書左右部十一月辛丑遣官審理陝西重  
刑赦河西民徙居應州其不能自贍者給牛具及粟麥



種仍賜布人二匹乙巳詔諭史天澤朕或乘怒欲有所  
誅殺卿等宜遲留一二日覆奏行之丙午詔特徵人員  
宜令乘傳十二月丙辰立河南山東統軍司以塔爾渾  
和爾齊為河南路統軍使盧昇副之東距亳州西至均  
州諸萬戶隸馬察克布哈為山東路統軍使武秀副之  
西自宿州東至寧海州諸萬戶隸馬罷各路急遞鋪丁  
已立十路宣慰司以真定路達嚕噶齊趙瑁等為之辛  
酉立諸路轉運使以燕京路監權官曹澤等為之使癸

亥享太廟詔各路總管兼萬戶者止理民事軍政勿預其州縣官兼千戶百戶者仍舊丙寅申嚴屠殺牛馬之禁己巳詔諸路管民總管子弟有分管州府司縣及鷹坊人匠諸色事務者罷之

四年春正月乙酉禁蒙古軍馬擾民丙戌以姚樞為中書左丞改諸路監權課稅所為轉運司甲午立十路鄂囉總管癸卯詔興河南等處鐵冶及設東平等路巡禁私鹽軍乙巳詔以諸路漢軍鄂囉毋隸各萬戶管領其

科徵差稅山東河南隸統軍司東西兩川隸征東元帥府陝西隸行戶部敕總帥汪忠臣都元帥托迪及劉整等益兵付都元帥竒徹成青居山仍以解州鹽課給軍糧丙午以瑪哈穆特所俘濟南老僧口之民為奴者付原籍為民辛亥申禁民畜兵器及蒙古軍擾民者二月甲寅詔諸路官員子弟入質甲子車駕如開平以王德素充國信使劉公諒副之使于宋詰其稽留郝經之故詔諸路置局造軍器私造者處死民間所有不輸官者

興私造同三月戊辰遣扎瑪里鼎和糴東京癸卯初建  
太廟夏四月癸丑選益都兵千人充武衛軍戊寅召竇

默許衡乘驛赴開平五月乙酉初立樞密院以皇子燕

王守中書令兼判樞密院事戊子升開平府為上都

按地

理志開平府中統五年以闕廷所在加號上都紀則書  
于四年與志異攷中統止有四年明年即改元至元蓋  
志誤也辛卯詔立燕京平準庫六月癸酉建帝堯廟于平

陽以錫津為中書右丞相塔齊為中書左丞相秋七月

癸未詔諸投下毋擅勾攝燕京路州縣官吏乙酉禁野

狐嶺行營民毋入南北口縱畜牧損踐桑稼戊戌詔弛  
河南沿邊軍器之禁壬寅詔阿珠戒蒙古軍不得以民  
田為牧地八月辛亥置元帥府于大理命錫勒希總制  
鬼國大理兩路兵部郎中劉芳前使大理至吐蕃遇害  
命恤其家戊午以阿陶商挺行樞密院于成都凡成都  
順慶潼川都元帥府並聽節制甲子敕諸臣傳旨有疑  
者須覆奏壬申車駕至自上都九月乙酉立漕運河渠  
司庚寅遣使徵諸路賦稅錢帛冬十一月甲申詔以歲

不登量減阿蘇奇味各軍行餉東平大名等路旱量減  
今歲田租丙戌享于太廟以哈坦塔齊爾王磐張文謙  
行事十二月丁未朔以鳳翔屯軍汪惟正青居等軍刀  
國器平陽軍令益都元帥奇徹統之戌虎嘯寨甲戌敕  
駙馬阿爾布哈蒲萄戶依民例輸賦雅克喀幹達實愛  
滿僧道種田入租貿易輸稅

至元元年春正月壬午敕諸路宣慰司非奉旨無輒入  
覲已亥立諸路平準庫癸亥罷南邊互市申嚴持軍器

販馬越境私商之禁二月辛亥敕選儒士編修國史譯  
寫經書起館舍給俸以贍之壬子發北京都元帥阿哈  
所領軍疏雙塔漕渠癸酉車駕如上都弛邊城軍器之  
禁三月辛丑立漕運司以王光益為使夏四月己卯詔  
高麗國王王禎來朝上都修世見之禮辛酉以四川茶  
鹽商酒竹課充軍糧戊辰給新附軍糧餉五月乙亥遣  
蘇爾托音郭守敬行視西夏河渠庚辰敕劔州守將分  
軍守劔門丁亥釋宋私商五十七人給糧遣歸其國己

亥以中書右丞鈕祜祿納罕為平章政事六月戊申高麗國王王植來朝秋七月丁酉龍門禹廟成命侍臣阿哈托音代祀庚子額呀布格與諸王玉隆哈實阿實達錫里濟及其謀臣來歸詔諸王皆太祖之裔並釋不問其謀臣布拉噶等皆伏誅八月乙巳立諸路行中書省以中書左丞相耶律鑄參知政事張惠等行省事詔新立條格省併州縣定官吏員數分品從官職給俸祿頒公田計月日以考殿最均賦役招流移禁勿擅用官物



勿以官物進獻勿借易官錢勿擅科差役凡軍馬不得  
停泊村坊詞訟不得隔越陳訴恤鰥寡勸農桑驗雨澤  
平物價具盜賊囚徒起數月申省部定立諸王使臣驛  
傳稅賦差發不許擅招民戶癸丑命僧子聰同議樞密  
院事復其姓劉氏易名秉忠拜太保參領中書省事乙  
卯改燕京為中都丁巳大赦改元九月壬申朔立翰林  
國史院以改元詔諭高麗國并赦其境內辛巳車駕至  
自上都冬十月壬寅朔高麗國王王植來朝庚戌有事

於太廟十一月壬辰罷領中書左右部併入中書省以  
領中書省左右部兼諸路都轉運使知太府監事阿哈  
瑪特為平章政事領中書省左右部兼諸路都轉運使  
阿里為中書右丞十二月乙巳罷各投下達嚕噶齊定  
中外百官儀從庚午詔罷樞密院斷事官及各路鄂囉  
官立遷轉法

二年春正月辛未朔日有食之癸酉徙鎮海巴勒巴沁  
謙州諸色匠戶於中都又徙諾觀特木德克駁手人匠

八百名赴中都造船運糧甲申詔申嚴越境販馬之禁  
乙酉以河南北荒田分給蒙古軍耕種二月辛丑朔元  
帥按東興宋兵戰于釣魚山敗之甲辰初立宮闈局丁  
巳車駕如上都癸亥并六部為四禁山東東路私煎硝  
鹵甲子以蒙古人充各路達魯噶齊漢人充總管回回  
人充同知永為定制以同知東平路宣慰使保赫鼎為  
平章政事山東廉訪使王晉為參知政事廉希憲商挺  
罷三月乙未罷南北互市括民間南貨官給其直以遼

東饑發粟并鈔賑之夏五月戊子禁北京平灤等處人  
捕獵庚寅詔西川山東南京等路戍邊軍屯田閏月癸  
亥移秦蜀行省于興元丁卯分四親王南京屬州鄭州  
隸哈坦鈞州隸明埒睢州隸博囉齊蔡州隸海都他屬  
縣復還朝廷以平章政事趙壁行省于南京河南府大  
名順德洺磁彰德懷孟等路平章政事廉希憲行省事  
于東平濟南益都淄萊等路中書左丞姚樞行省事于  
西京平陽太原等路詔得路州府戶不滿千者量加併

省各投下者併入所隸州城其散府州郡戶少者不須更設錄事司及司候司附郭縣止令州府官兼領六月戊寅移山東統軍司於沂州己卯王晉罷秋七月辛酉賑益都饑民癸卯安南國王陳光昞遣使奉表來貢八月己卯諸宰職皆罷以安圖為中書右丞相巴延為中書左丞相戊子召許衡于懷孟楊誠于益都車駕至自上都冬十月己卯享于太廟戊子詔隨路私商曾入南界者首實免罪充軍十二月乙巳省併州縣凡二百二

十餘所庚午宋子貞言朝省之政不宜數行數改又刑部所掌事干人命尚書嚴忠範年少宜選老于刑名者為之又請罷北京行中書省別立宣慰司以控制東北州郡並從之

三年春正月丙午遣使撫諭四川將吏軍民壬子立制國用使司以阿哈瑪特為使二月丙寅復以廉希憲宋子貞為平章政事張文謙復為中書左丞史天澤為樞密副使壬午以中書丞張易同知制國用使司事張惠

為制國用副使癸未車駕如上都甲申罷西夏行省立  
宣慰司初製太常禮樂工冠服立東京廣寧懿州開元  
率賓海蘭博索等路宣撫司三月己未王晉及侍中和  
爾扎達濟南益都轉運使王明以隱匿鹽課伏誅夏四  
月丁卯亳州水軍千軍胡進等與宋人戰于荆山敗之  
五月乙未遣使諸路慮囚丙午浚夏中興漢延唐來等  
渠丙辰罷益都行省蠲平灤益都質子戶賦稅之半六  
月丁卯封諾木歡為北平王丙子立漕運司戊寅申嚴

陝西河南竹禁立拱衛司秋七月丙申罷息州安撫司

丙午遣使祀五嶽四瀆

按是時南北未一五嶽四瀆有不在其封內者所謂遣使益遙

祭甲寅添內外巡兵八月丁卯以兵部侍郎赫德禮部

侍郎殷弘使日本戊子阿珠略地斬黃俘獲甚衆九月

戊午車駕至自上都冬十月丁丑徙平陽經籍所于京

師太廟成定為八室申禁京畿畋獵十一月辛卯初給

京府州縣司官吏俸及職田戊戌瀕御河立漕倉丁未

申嚴殺牛馬之禁宋子貞致任辛亥以呼圖克岱爾為



中書左丞相禁天文圖讖等書十二月庚申給諸王哈  
必齊行軍印辛酉改四川行樞密院為行中書省以賽  
音諤德齊伊蘇岱爾等簽行中書省事丁亥鑿金口導  
盧溝水以漕西山木石

四年春正月癸卯修曲阜宣聖廟乙巳百濟遣其臣梁

浩來朝禁僧官侵理民訟辛亥以趙璧為樞密副使立

諸路洞冶都總管府戊午城中都

中都元史作大都按地理志燕京至元元

年改中都四年始于中都之東北置今城而遷都馬九年改大都此時尚未有大都之名蓋沿誤也謹據改

二月庚申鈕祜祿納罕復為平章政事阿里復為中書  
右丞丁卯改經籍所為弘文院以馬天昭知院事丁亥  
車駕如上都詔陝西行省招諭宋人三月己丑復以耶  
律鑄為中書左丞相壬寅安圖言比者省官員數平章  
左丞各一員今丞相五人素無此例臣等議擬設二丞  
相臣等蒙古人三員惟陛下所命詔以安圖為長史天  
澤次之其餘蒙古漢人參用勿令員數過多又詔宜用  
老成人如姚樞等一二員同議省事丁巳耶律鑄制宮

縣樂成夏四月甲子築宮城五月丁亥朔日有食之敕上都重建孔子廟六月壬戌以中都順天東平等處蠶災免民戶絲料輕重有差乙丑復以史天澤為中書左丞相呼圖克岱爾耶律鑄並降平章政事巴延降中書右丞廉希憲降中書左丞阿里張文謙並降叅知政事秋七月壬寅申禁京畿牧地之禁八月丙寅復立宣徽院以前中書右丞相錫津為使丁丑封于呼克齊為雲南王阿珠略地至襄陽宋人來拒阿珠擊敗之九月壬

辰作玉殿于廣寒殿中乙未總帥汪良臣請立寨于穆  
章德山控扼江南以當釣魚之衝從之戊申以許衡為  
國子祭酒癸丑車駕至自上都冬十月庚辰定品官子  
孫廕叙格十一月乙酉享于太廟十二月庚辰立諸位  
諤都總管府

五年春正月辛丑敕陝西五路四川行省造戰艦付劉  
整閏月戊午以陳亮頴蔡等處屯田戶充軍二月己丑  
給河南山東貧乏軍士鈔三月丙寅罷諸路四品以下

子孫入質者丁丑敕阿里等詣軍前閱視軍器夏四月  
壬寅遣使祀嶽瀆五月辛亥朔以太醫院拱衛司教坊  
司及尚食尚果尚醞三局隸宣徽院癸亥都元帥伯嘉  
努拔宋嘉定五花石城白馬三砮秋七月癸丑立御史  
臺以右丞相塔齊爾為御史大夫詔諭之曰臺官職在  
直言朕或有未當其極言無隱戊戌罷西夏宣撫司庚  
午省諸路打捕鷹坊工匠洞冶總管府令轉運司兼領  
之丙子立西夏惠民局九月丁巳阿珠統兵圍樊城已

丑車駕至自上都冬十月戊寅朔日有食之己丑敕中  
書省樞密院凡有事與御史臺官同奏庚寅敕從臣托  
果斯等錄毛詩孟子論語乙未享于太廟以和爾果斯  
圖古勒充翰林待制兼起居注戊戌宮城成劉秉忠辭  
領中書省事許之為太保如故十一月庚申宋兵自襄  
陽來攻沿山諸寨阿珠分諸軍禦之斬獲甚衆十二月  
戊寅敕二分二至及聖誕節日祭星于司天臺

六年春正月戊午阿珠軍入宋境至復州德安府荆山

等處俘獲甚衆甲戌賑益都淄萊及恩州饑民敕史天澤與樞密副使駙馬呼喇珠董師襄陽二月壬午以立四道按察司詔諭諸道己丑詔以新製蒙古字頒行天下丁酉敕鞍靴箭鏃等物自今不得以黃金為飾三月戊午賑曹州饑夏四月甲午賑大名等路饑五月丙午賑東平路饑六月癸卯詔董文炳等率兵南征秋七月己巳立諸路蒙古字學癸酉立國子學遣官申理諸路寃滯又詔諭宋國官吏軍民示以不欲用兵之意宋將

夏貴以兵援襄陽至鹿門山萬戶解汝楫李庭以舟師  
擊敗之八月丙申詔諸路勸課農桑命中書省采農桑  
事列為條目仍令提刑按察司與州縣官相風土之所  
宜講究可否別頒行之九月戊午敕民間貸錢取息雖  
踰限止償一本息壬戌以豐州雲南東勝早免其租賦  
辛未以呼喇珠史天澤並平章政事阿里中書右丞行  
河南等路中書省事賽音諤德齊行陝西五路西蜀四  
川中書省事車駕至自上都冬十月己卯定朝儀服色



十一月癸卯高麗內叛遣將往討定之十二月戊子築  
東安渾河堤

七年春正月丙午耶律鑄廉希憲罷立尚書省罷制國  
用使司以平章政事呼圖克岱爾為中書左丞相國子  
祭酒許衡為中書左丞制國用使阿哈瑪特平章尚書  
省事同知制國用使司事張易同平章尚書省事制國  
用使司副使張惠簽制國用使司事李堯咨敏珠爾丹  
並叅知尚書省事二月辛未朔以前中書右丞相巴延

為樞密副使甲戌築昭應宮于高梁河丙子帝御行宮  
觀劉秉忠博囉許衡及太常卿徐世隆所起朝儀丁丑  
以歲饑罷修築宮城役夫甲申置尚書省署壬辰立司  
農司以叅知政事張文謙為卿設四道巡行勸農司乙  
未宋襄陽出步騎萬餘人兵船百餘艘來趨萬山堡萬  
戶張弘範千戶托克托擊敗之高麗國王王植來朝三  
月庚子朔日有食之改河南等路及陝西五路西蜀四  
川東京等路行中書省為行尚書省甲寅車駕如上都

丙辰浚武縣御河夏四月壬午設諸路蒙古字學教授  
定諸路達魯噶齊子弟廕叙癸未定軍官等級以所管  
軍士為差五月癸卯陝西簽省伊蘇岱爾嚴忠範興東  
西川統軍司率兵及宋兵戰于嘉定重慶釣魚山馬湖  
江皆敗之拔其三寨擒都統牛宣丁未以同知樞密院  
事哈達為平章政事丙辰改宣徽院為光祿司以宣徽  
使錫津為光祿使六月庚辰敕戍軍還有乏食及病者  
令所過州城村坊主者給食醫藥丙申立藉田中都東

南郊禁民擅入宋境剽掠秋七月辛丑設上林署乙丑  
閱實諸路礮手戶都元帥伊蘇岱爾等略地光州敗宋  
兵于金剛臺以遼東開元等路總管府兼本路轉運司  
事八月戊辰朔築環城以逼襄陽己巳賑應昌府饑庚  
辰以御史大夫塔齊爾同知樞密院事御史中丞特濟  
為御史大夫九月丙寅括河西戶口定田稅冬十月癸  
酉敕宗廟祭祀祝文書以國字乙亥宋人攻莒州乙酉  
享于太廟己丑敕太廟牲牢用野豕時果勿市取之內

園車駕至自上都賑山東淄萊路饑閏十一月戊辰禁  
繒段織日月龍虎及以龍犀飾馬鞍者癸未敕西夏管  
民官禁僧徒冒據民田十二月丙申朔改司農司為大  
司農司添設巡行勸農使副各四員以御史中丞博囉  
蕪大司農卿以陝西等路宣撫使趙良弼為秘書監充  
國信使使日本敕歲祀太社太稷風師雨師雷師辛酉  
建大護國仁王寺于高梁河敕更定僧服色

欽定續通志卷五十八

欽定四庫全書

史部

欽定續通志卷

五十九

主事 臣 尹壯圖 覆勘

總校官原任侍講 臣 王燕緒

欽定四庫全書

欽定續通志卷五十九

元紀

世祖二

至元八年春正月己卯以同簽河南等路行中書省事  
阿爾哈雅叅知尚書省事壬辰敕諸路鰥寡孤獨疾病  
不能自存者官給廬舍薪米高麗國王王植遣使奉表  
為世子悒請昏詔禁邊將受賂放軍及科斂賑北京益

都餓二月乙未朔定民間婚聘禮幣貴賤有差丁酉發  
中都真定順天河間平灤民二萬八千餘人築宮城己  
亥罷諸路轉運司入總管府以尚書省奏定條畫頒天  
下以中書左丞東京等路行尚書省事趙壁為中書右  
丞乙巳以沙州瓜州廂坊人充軍戊申詔以治事日程  
諭中外官吏己未敕軍官佩金銀符其民官工匠所佩  
者並拘入勿復給辛酉賑西京餓三月甲申車駕如上  
都乙酉許衡以老疾辭中書機務除集賢大學士國子



祭酒己丑命尚書省閱實天下戶口頒條畫諭天下賑  
益都等路饑夏四月戊午阿珠率萬戶阿嚙罕等與宋  
將范文虎等戰于湍灘敗之獲統制朱勝等百餘人五  
月乙丑以東道兵方圍襄陽命蹇音諤德齊鄭鼎提兵  
水陸並進趨嘉定汪良臣彭天祥出重慶札拉布哈出  
瀘州竒爾濟蘇出汝州以牽制宋師丙寅牢魚國來貢  
丁丑賑蔚州饑己卯命史天澤平章軍國重事辛巳命  
蒙古官子弟好學者兼習算術六月甲午敕樞密院凡

軍事徑奏不必經由尚書省其千錢糧者議之癸卯宋將范文虎率蘇劉義夏松等舟師十萬援襄陽阿珠率諸將擊敗之平章哈達又遣萬戶解汝楫等邀擊擒其總管朱日新鄭臯大破之辛亥敕凡管民官所領錢穀公事並俟年終考較乙卯招集河西鄂端阿濟爾噶等處居民秋七月壬戌朔設回回司天臺官屬丁卯以國王特訥克行尚書省于北京遼東等路乙酉宋將來興國攻百丈山營阿珠擊破之八月壬辰朔日有食之壬

子車駕至自上都已未聖誕節初立內外仗及雲和署  
樂位東川統兵司引兵攻宋銅鈹寨守寨總管李慶等  
降以慶知梁山軍事九月壬戌朔阿珠以所部兵略地  
漢南丙寅罷陝西五路西蜀四川行尚書省以伊蘇達  
爾行四川尚書省事于興化京兆等路直隸尚書省敗  
宋軍于渦河丙子敕今歲享太廟毋用犧牛壬午宋兵  
攻膠州千戶蔣德等逆戰敗之俘統制范廣等五十餘  
人癸未詔以四川民力困弊免茶鹽等課稅以軍民田

租給沿邊軍食仍敕有司自今有言茶鹽之利者以違  
制論冬十月丁酉享于太廟十一月辛酉朔敕品官子  
孫保直乙亥禁行金泰和律建國號曰大元丙戌置四  
川行尚書省于成都十二月辛卯朔詔天下興起國字  
學

九年春正月甲子併尚書省入中書省以平章尚書省  
事阿哈瑪特同平章尚書省事張易並中書平章政事  
叅知尚書政事張惠為中書左丞叅知尚書省事李堯

咨敏珠爾丹並叅知中書政事庚辰改北京中興四川  
河南四路行尚書省為行中書省京兆復立行省壬午  
改山東東路都元帥府統軍司為行樞密院以伊蘇岱  
爾達春並為行樞密院副使二月辛卯詔扎爾古齊乃  
太祖開創之始所置位百司右其賜銀印立左右司壬  
辰改中都為大都庚子建中書省於大都戊申始祭先  
農如祭社之儀詔諸路開浚水利車駕如上都三月甲  
戌括民間四教經焚之賑濟南路饑夏四月甲寅賑大

都路饑五月庚午減鐵冶戶罷西番金銀礦戶為民六月己亥山東路行樞密院達春攻破射龍溝五港口鹽場白頭河城堡殺宋兵三百餘人秋七月丁巳朔禁私鬻回回厯賑碩達勒達部饑戊寅集都城僧誦大藏經九會壬午和爾果斯奏蒙古字設國子學而漢官子弟未有學者及官府文移猶有輝和爾字詔自今凡詔令並以蒙古字行仍遣百官子弟入學八月丙戌朔日有食之戊子立羣牧所癸卯千戶崔松敗宋襄陽援兵斬

其將張順乙已車駕至自工都癸丑賑遼東等路饑九月甲子宋襄將張貴出戰阿珠阿爾哈雅等敗之生獲貴及將士二千餘人戊寅賑益都路饑冬十月丙戌朔封子莽噶拉木為安西王賜京兆為分地駐兵六盤山遣使特詔諭巴勒布國痕都斯坦國壬辰享于太廟癸巳以趙璧為平章政事張易為樞密副使乙未築渾河堤十一月壬戌諸王哲伯特穆爾築新城成賜名永昌府辛未召高陸儒者楊恭懿不至己卯併中書省左右

司為一叅知行省政事阿爾哈雅言襄陽受圍久未下  
宜先攻樊城斷其聲援從之十二月乙酉朔詔諸路府  
州司縣達嚕噶齊管民長官兼管諸軍鄂囉辛亥宋將  
咎萬壽攻成都簽省嚴忠範戰失利詔逮至京

十年春正月癸亥阿爾哈雅等攻樊城拔之丁卯立秘  
書監二月丙戌以皇后皇太子受冊寶遣太常卿哈坦  
告於太廟丁未宋京西安撫使知襄陽府呂文煥以城  
降三月甲寅朔申諭大司農司遣使巡行勸課丙寅帝



御廣寒殿遣攝太尉中書右丞相安圖授皇后瀉吉哩  
氏玉冊玉寶遣攝太尉同知樞密院事巴延授皇太子  
珍噶玉冊金寶辛未以皇后皇太子授冊寶詔告天下  
癸酉以前中書左丞相耶律鑄平章軍國重事  
中書左丞張惠為中書右丞車駕如上都夏四月癸未朔阿爾  
哈雅以呂文煥入朝授文煥昭勇大將軍侍衛親軍都  
指揮使襄漢大都督罷河南等路行中書省以平章軍  
國重事史天澤平章政事阿珠叅知政事阿爾哈雅行

荆湖等路樞密院事鎮襄陽左丞相哈坦參知行中書  
省事劉整山東都元帥達春董文炳行淮西等路樞密  
院事守正陽天澤等陞辭諭以襄陽之南多有堡寨宜  
乘機進取仍以鈔五千錠賜將士及賑新附軍民五月  
壬子朔定內外官復舊制三歲一遷戊辰詔天下獄囚  
除殺人者待報餘並釋之六月乙酉賑諸王塔齊爾部  
民饑丁亥以各路弓矢甲匠並隸軍器監免大都兩京  
南路賦役辛卯汰陝西貧難軍癸巳敕襄陽造戰艦丁

酉置光州等處招討司閏月己巳罷東西兩川統軍司  
秋七月庚寅以河南水發粟賑之仍免今年田租省西  
涼府入永昌路八月庚戌朔赦前所釋諸路囚自至大  
都者九月辛巳以赫伯為平章政事丙午車駕至自上  
都冬十月乙卯享于太廟丙辰敕巴延和爾果斯以史  
天澤姚樞所定新格參考行之十二月甲寅宋夏貴攻  
正陽淮西行院擊走之壬戌召阿珠同呂文煥入覲  
十一年春正月己卯朔宮闕告成帝始御正殿受皇太

子諸王百官朝賀庚寅初立軍官以功升散官格免諸路軍雜賦丙午彰德趙當道等以謀逆伏誅詔中書省簽軍十萬人二月壬申造戰船八百艘於汴梁以廉希憲為中書右丞北京等處行中書省事車駕如上都二月己卯詔以勸課農桑諭高麗國王王禎仍命安撫高麗軍民總管洪俊奇提點農事辛卯改荆湖淮西二行樞密院為二行中書省巴延史天澤並為左丞相按巴延為

左丞相續通鑑綱目載在正月

阿珠為平章政事阿爾哈雅為右丞呂

文煥為參知政事行中書省于荆湖哈達為左丞相劉  
整為左丞達春董文炳為參知政事行中書省于淮西  
夏四月癸丑初建東宮五月丙申以女呼圖克庫哩頁  
額實下嫁高麗世子王愷六月庚申問罪于宋甲子分  
遣孟古岱巴圖伯嘉努率武衛軍南征丙寅以哈喇哈  
斯為中書左丞崔斌參知政事仍行河南道宣慰司事  
秋七月乙亥朔敕山北遼東道提刑按察使烏魯斯布  
哈同參知政事廉希憲行省北京國王特訥克母署事

有大事則希憲等就議癸未宋主禘殂子曩嗣位

據宋史增

癸巳高麗國王王植薨遣同知上都留守司事張煥冊

其子慊為高麗國王乙未巴延等陞辭帝諭之曰古之

善取江南者唯曹彬一人汝能不殺是吾曹彬也八月

甲辰朔頒諸路立社稷壇壝儀式丁未復改淮西行中

書省為行樞密院甲寅弛河南軍器之禁九月丙戌行

中書省以大軍發襄陽檄諭宋州郡官吏將校士民癸

巳巴延攻郢州萬勝堡拔之車駕至自上都冬十月己

酉享於太廟乙丑巳延督諸將破沙洋堡丙寅攻新城  
拔之十一月壬午救西川行樞密院伊蘇岱爾取嘉定  
府乙酉軍次復州宋安撫使翟貴出降丁亥詔宋嘉定  
安撫咎萬壽及凡守城將校納款來降與避罪及背主  
叛亡者悉從原免癸巳東川元帥楊文安與青居山蒙  
古萬戶克呼克額濟類等會兵達州直趨雲安軍至馬  
湖江與宋兵遇大破之遂拔雲安羅拱高陽城堡十二  
月丙午巳延大軍次漢口遂入大江乙卯阿爾哈雅督

萬戶張弘範等攻武磯堡拔之丁巳巴延登武磯山宋  
荆湖宣撫使朱禩孫遁歸江陵己未師次鄂州宋直秘  
閣湖北提舉張晏然權知漢陽軍王儀知德安府來興  
國並以城降荆鄂諸軍都統程鵬飛以本軍降巴延承  
制以宋鄂州民兵總制王該知鄂州事王儀來興國仍  
舊任撤其戍兵分隸諸軍禁侵暴凡逃民悉縱還之以  
阿爾哈雅兵鎮鄂漢巴延阿珠將大軍水陸東下以侍  
衛親軍都指揮使圖們岱為諸軍殿以襄陽路總管賈



居貞為宣撫使商議行中書省事

十二年春正月甲戌大軍次黃州宋沿江制置副使知黃州陳奕及其子知漣州巖皆以城降乙亥東川副都元帥張德潤拔禮義城癸未師次蘄州宋安撫使管景橫以城降丙戌次江州宋西安撫使知江州錢真孫及淮西路六安軍曹明並迎降己丑選蒙古輝和爾漢人十四人赴軍前為新附州郡民官乙未遣兵部尚書廉希賢工部侍郎嚴忠範秘書監丞柴紫芝奉國書使

於宋二月癸卯大軍次安慶府宋殿前都指揮使知安  
慶府范文虎出降甲辰以中書右丞博囉罕為淮南都  
元帥中書右丞阿里左右副都元帥仍命阿里薩奇蘇  
等各部蒙古漢軍會邳州又發蘄宿戍兵將河南戰船  
千艘赴之立后土祠于平陽之臨汾伏羲女媧舜湯河  
瀆等廟于河中解州洪洞趙城丙午大軍次池州宋都  
統制張林以城降丁未禁無籍自效軍俘掠新附軍民  
戊申詔諭江黃鄂岳漢陽安慶等處歸附官吏士民軍

匠僧道人等令各安已業如鎮守官吏妄有搔擾詣行  
中書省陳告史天澤卒召游顯楊庭訓赴闕壬子宋都  
督賈似道遣計議宋京承宣使阮思聰詣行中書省請  
還已降州郡約貢歲幣已延不許庚申遣塔布岱幹魯  
召鄂漢降臣張晏然等赴闕辛酉師次丁家洲宋賈似  
道等率舟師拒戰已延命舉巨砲擊之宋兵大潰甲子  
師次蕪湖宋江東運判知太平州孟之縉降都元帥博  
囉罕次海州宋知州丁順以城降乙丑遣使諭江陵府

制置司及高達已下官吏軍民宋福州團練使知特摩  
道事農士貴率知那寡州農天或知阿吉州農昌成知  
上林州農道賢州縣三十有七戶十萬詣雲南行中書  
省請降戊辰師次采石宋知和州王善降都元帥博囉  
罕次漣州宋知州孫嗣武降庚午師次建康宋都統權  
兵馬司事徐王榮等以城降賈似道遣總管段佑送國  
信使郝經劉人傑等來歸車駕如上都三月壬申朔宋  
鎮江府馬軍總管石祖忠以城降行中書省分遣淮西

行樞密院安塔哈駐京口甲戌宋江陰軍簽判李世修  
以城降丙子國信使廉希賢等至建康詔諭諸將各守  
營壘毋得妄有侵掠宋知滁州王文虎降庚辰宋知寧  
國府顏紹卿以城降江東路得府二州五軍二縣四十  
三戶八十三萬一千八百五十二口一百九十一萬九  
千一百六丙戌宋常州安撫戴之泰通判王虎臣以城  
降國信使廉希賢嚴忠範等至宋廣德軍獨松關為宋  
人所殺丁亥免諸路軍雜賦庚子分置翰林院專掌蒙

古文字以翰林學士承旨薩迪密迪哩主之其翰林兼  
國史院仍舊纂修國史典制誥備顧問以翰林學士承  
旨兼修起居注和爾果斯主之辛丑敕阿珠分兵取揚  
州夏四月丙午阿爾哈雅駐軍江陵城南沙市攻其柵  
破之宋知荆門軍劉懋降丁未阿爾哈雅遣郎中張鼎  
齋詔入江陵宋荆湖制置朱禩孫按續通鑑綱目咸淳  
十年以朱禩孫為宣  
撫使兼知江陵府元史阿爾哈雅傳載朱禩孫降元  
亦稱宣撫于此乃云荆湖制置今仍原文而識其異  
湖  
北制置副使高達京西湖北提刑青陽夢炎李湜俱出

降遂入江陵分道遣使招諭未下州郡宋知陝州趙真

知歸州趙仔權澧州安撫毛浚

澧州元史誤豐州按上文分諭江陵係宋荆湖

北路考宋史地理志澧州與峽州歸州常德府皆屬荆湖北路無豐州之名今改正常德府新城

總制魯希文舊城權知府事周公明等悉以城降辛亥

遣使招諭宋五郡鎮撫使呂文福辛酉宋郢州安撫趙

孟復州安撫翟貴降癸亥阿珠駐師瓜洲宋淮東制置

司盡焚城中廬舍遷其民而去丙寅立尚牧監免京畿

百姓今歲絲銀丁卯以大司農御史中丞搏囉為御史

大夫罷隨路巡行勸農官以其事入提刑按察司括諸  
寺闡遺人口庚午以高達為參政事五月辛未朔詔中  
書右丞廉希憲參知政事托博和囉哈圖行中書省于  
江陵府阿爾哈雅還鄂州辛巳宋知辰州呂文興黃仙  
洞行隋州事傅安國仙人寨行均州事徐鼎知沅州文  
用圭知靖州康玉知房州李鑑等皆以城降荆南湖北  
路凡得府三州十一軍四縣五十七戶八十萬三千四  
百一十五口一百一十四萬三千八百六十丁亥召巴



延赴闕庚寅宋五郡鎮撫使呂文福來降壬辰宋都統  
制劉師勇殿帥張彥據常州六月庚子朔日有食之宋  
嘉定安撫使咎萬壽以城降賜名順甲午以萬戶阿嚙  
罕為行中書省參知政事辛酉宋潼川安撫使知江安  
州梅應春以城降丙寅宋揚州都統姜才副將張林乘  
夜攻揚子橋木柵阿珠自瓜洲以兵赴援大敗之生擒  
張林秋七月庚午朔阿珠集行省諸翼萬戶兵船于瓜  
洲安塔哈董文炳集行院諸翼萬戶兵船于西津渡宋

沿江制置使趙潛樞密都承旨張世傑知泰州孫虎臣  
等陳舟師于焦山南北阿珠分遣萬戶張弘範等擊之  
宋師大敗壬午敕左丞相巴延率諸將直趨臨安右丞  
阿爾哈雅取湖南蒙古萬戶宋都木達漢軍萬戶武秀  
張榮實李恒兵部尚書呂師夔行都元帥府取江西罷  
淮西行樞密院以右丞安塔哈參政董文炳同署行中書  
省事甲午以巴延為中書右丞相阿珠為中書左丞相

八月己亥朔

按八月己亥下元史脫朔字攷七月庚午朔至己亥方三十日其為朔日無疑今增

免北京西京陝西等路今歲絲銀癸卯巳延陞辭南行  
奉詔諭宋君臣相率來附則趙氏族屬可保無虞宗廟  
悉許如故辛酉軍駕至上都九月庚午禁私造銅器

甲午宋揚州都統姜才將步騎兵攻灣頭堡阿珠安塔  
哈擊敗之丙申以伊實特穆爾為御史大夫括江南諸

郡書版及臨安秘書省乾坤寶典等書冬十月戊戌朔

享于太廟十一月丁卯阿爾哈雅以軍攻潭州

按阿爾哈雅攻

潭州續通鑑綱目載  
在十月與元史異

乙亥巳延分軍為三趨臨安丙子

宋權融宜欽三州總管岑從毅沿邊巡檢使廣西節制  
軍馬李維屏等詣雲南行中書省降己卯宋都木達等  
軍次隆興府宋江西轉運使知府劉槃以城降江西諸  
郡相繼歸附得府州六軍四縣五十六戶一百五萬一  
千八百二十九口二百七萬六千四百壬午巴延攻常  
州拔之乙酉阿嚙罕克廣德趨獨松關庚寅巴延遣降  
人游介實奉璽書副本使于宋仍以書諭宋大臣甲午  
以高麗國官制僭濫遣使諭旨凡省院臺部官名爵號

與朝廷相類者改正之十二月辛丑董文炳軍次許浦  
宋都統制祁安以本軍降宋主為書介國信副使嚴忠  
範姪煥請和甲辰巴延次平江府宋都統王邦傑以城  
降乙巳免江陵等處今歲田租庚戌元史誤作庚子  
茲據宋史改宋  
主復遣尚書夏士林右史陸秀夫奉書稱姪乞和甲子  
答宋國主書今其來降丙寅阿嚙罕軍次安吉州宋安  
撫使趙與可以城降

十三年春正月丁卯朔克潭州湖南州郡相繼降附得

府一州六軍二縣四十戶五十六萬一千一百一十二

口百五十三萬七千七百四十巴延次嘉興宋安撫劉

漢傑以城降

安宋史德祐二年載嘉興守劉漢傑以城降元續通鑑綱目亦載知嘉興府劉漢傑

元史獨以安撫稱後又載漢傑仍為其府安撫使考宋史職官志安撫使一條云中興以後出守者亦可兼使或漢傑知嘉興府時兼攝安撫亦屬史家互紀之法董文炳至乍浦宋統制官劉

英以本軍降辛未文炳至海鹽宋知縣事王與賢及澈

浦鎮統制胡全福建路馬步軍總管沈世隆皆降立回

易庫于諸路癸酉宋相陳宜中遣軍器監劉庭瑞齎宋

主稱藩表章詣軍前稟議又致宜中等書于巴延巴延以書答之乙亥宋復遣監察御史劉岳齋宋主稱藩表至軍前且致書巴延為宗社生靈請命丁丑宋遣都統洪模齋陳宜中吳堅等書請俟宗長福王至同詣軍前戊寅巴延以軍出嘉興府留萬戶呼圖克千戶王圖烈齊戍之以劉漢傑仍為其府安撫使辛巳軍次崇德縣宋遣侍郎劉庭瑞都統洪模來迓壬午軍次長安鎮董文炳以兵來會宋陳宜中吳堅等違約不至癸未軍次

臨平鎮甲申次臯亭山阿嘯罕以兵來會宋主遣保康  
軍承宣使尹甫和州防禦使吉甫等齎傳國王璽及降  
表詣軍前巴延受之復遣囊嘉特以趙尹甫賈餘慶等  
還臨安召宰相出議降事乙酉師次臨安北十五里宋  
陳宜中張世傑蘇劉義劉師勇等挾益廣二王出嘉會  
門渡浙江遁去巴延使阿嚙罕董文炳范文虎率諸軍  
先據守錢塘口以勁兵追陳宜中等不及而還丙戌巴  
延下令禁軍士入城違者以軍法從事遣呂文煥齎黃



榜安諭臨安中外軍民俾安堵如故巴延又遣宣撫程  
鵬飛計議孫鼎亨囊嘉特洪君祥入宮安諭宋太皇太  
后戊子宋太皇太后謝氏遣其丞相吳堅文天祥樞密  
謝堂安撫賈餘慶中貴鄧惟善來見巴延于明因寺巴  
延留文天祥不遣且以其降表不稱臣仍書宋號遣程  
鵬飛洪君祥偕來使賈餘慶復往易之己丑軍次湖州  
市遣千戶囊嘉特省椽王祐齋傳國玉璽赴闕辛卯張  
弘範孟祺程鵬飛齋所易宋主稱臣降表至軍前二月

丁酉朔

按元史不書朔考宋史瀛國公紀德祐二年二月丁酉下有朔字以正月丁卯朔推之亦合今

據增

詔劉頡程德輝招淮西制置使夏貴己亥克臨江軍

庚子宋文武百司出臨安府詣行中書省各以其職來

見巴延承制以臨安為兩浙大都督府都督孟古岱范

文虎入城視事辛丑巴延令張惠阿嚙罕董文炳左右

司官石天麟楊晦等入城取軍民錢穀之數閱實倉庫

收百官誥命符印悉罷宋官府散免侍衛禁軍宋主焜

遣其右丞相賈餘慶等充祈請使巴延以文天祥同行

兩浙路得府八州六軍一縣八十一戶二百九十八萬  
三千六百七十二口五百六十九萬二千六百五十丁  
未詔諭臨安新附府州司縣官吏軍民人等曰聞者行  
中書省右丞相巴延遣使來奏宋母后幼主暨諸大臣  
百官已於正月十八日齋壇設奉表降附朕惟自古降  
王必有朝覲之禮已遣使特往迎致爾等各守職業其  
勿妄生疑畏凡歸附前犯罪悉從原免公私逋欠不得  
徵理一應抗拒王師及逃亡嘯聚者並赦其罪百官有

司諸王邸第三學寺監秘省史館及禁衛諸司各宜安居所在山林河泊除巨木花果外餘物權免徵稅祕書省圖書太常寺祭器樂器法服樂工鹵簿儀衛宗正譜牒天文地理圖冊凡典故文字并戶口版籍盡仰收拾前代聖賢之後高尚儒醫僧道卜筮通曉天文歷數并山林隱逸名士仰所在官司具其名聞名山大川寺觀廟宇并前代名人遺迹不許拆毀鰥寡孤獨不能自存之人量加贍給戊申立浙東西宣慰司於臨安以戶部

尚書麥歸秘書監焦友直為宣慰使吏部侍郎楊居寬  
同知宣慰司事並兼知臨安府事丁巳命焦友直括宋  
秘書省禁書圖籍戊午祀先農于東郊宋淮西制置夏  
貴以淮西諸郡來降淮西路得府二州六軍四縣三十  
四戶五十一萬三千八百二十七口一百二萬一千三  
百四十九庚申召巴延偕宋君臣入朝辛酉車駕如上  
都設資戒大會于順德府開元寺巴延遣木布周青招  
泉州蒲壽庚壽晟兄弟甲子董文炳索多發宋隨朝文

士劉襄然及三學諸生赴京師帝既平宋召宋諸將問曰爾等何降之易耶對曰宋有強臣賈似道擅國柄每優禮文士而獨輕武官臣等久積不平所以望風送款也帝命董文忠答之曰借使似道實輕汝曹特似道一人之過耳汝主何負焉正如所言則似道之輕汝也固宜三月丁卯巴延入臨安遣郎中孟祺籍宋太廟四祖殿景靈官禮樂器冊寶暨郊天儀仗及祕書省國子監國史院學士院太常寺圖書祭器樂器等物甲戌文天

祥自鎮江遁去乙亥巴延等發臨安丁丑安塔哈阿嚙罕董文炳趨宋主焘同太后入覲太皇太后謝氏以疾留戊寅敕淮西廬州置總管萬戶府以中書右丞河南等路宣慰使哈喇哈斯襄陽管軍萬戶實喇並行府事庚辰囊嘉特以宋玉璽來上乙酉贛吉袁南安四郡內附閏月丙申置宣慰司於濟寧路掌印造文鈔供給江南軍儲東川行樞密院總帥汪惟正略地涪州克山寨谿洞凡二十有三所丁酉詔湖廣阿爾哈雅呼圖克特

穆爾赴闕令托博和囉噶圖崔斌並留後鄂州辛亥命副樞張易遣宋降臣吳堅夏貴等赴上都戊午淮西萬戶府招降方山等六寨甲子以中書省左右司郎中郝禎參知政事夏四月戊辰以河南兵事未息開元路民饑並弛正月五月屠殺之禁丙子省東川行樞密院及成都經略司以其事入西川行院壬午召嗣漢天師張宗演赴闕乙酉召昭文館大學士姚樞翰林學士王磐翰林侍講學士圖克坦公履赴上都庚寅修太廟以北



京行中書省廉希憲為中書右丞行中書省事于荆南  
府五月乙未朔己延以宋主焘至上都制授焘開府儀  
同三司檢校大司徒封瀛國公以平宋遣官告天地祖  
宗于上都之近郊遣使代祀嶽瀆己亥罷兩浙宣慰司  
以孟古岱范文虎仍行兩浙大都督府事庚子定度量  
癸卯復沂莒膠密寧海五州所括民為防城軍者為民  
仍免租徭二年乙巳阿珠遣總管陳傑攻拔泰州之新  
城遣萬戶烏瑪喇守之以逼泰州丁未宋揚州都統姜

才攻灣頭堡阿爾彬擊走之戊申宋馮都統等自真州  
率兵襲瓜洲阿珠遣萬戶實喇罕阿都齊等出戰大敗  
之六月己巳以孔子五十三世孫曲阜縣尹孔治兼權  
主祀事辛未命阿爾哈雅征廣西壬申罷兩浙大都督  
府立行尚書省于鄂州臨安設諸路宣慰司以行省官  
為之並帶相銜其立行省者不立宣慰司甲戌以大明  
歷浸差命太子贊善王恂與江南日官置局更造新歷  
以樞密副使張易董其事宋揚州都統姜才夜率兵趨

丁村堡守將史弼章齎出戰阿里都督陳巖及巴延徹爾踵至大破之戊寅詔作平金平宋錄及諸國臣服傳記仍命平章軍國重事耶律鑄監修國史壬辰下詔招諭宋揚州制置李庭芝以次軍官及通泰真滌高郵所在官員又詔諭陳宜中張世傑蘇劉義劉師勇等使降李庭芝留朱煥守揚州與姜才率步騎五千東走泰州阿珠督右丞阿里萬戶劉國傑圍之以戶部尚書張澍參知政事行中書省事于北京秋七月乙未行中書省

左右司郎中孟祺以亡宋金玉寶及牌印來上命太府監收之乙巳朱煥以揚州降乙卯宋泰州守將孫良臣與李庭芝帳下卒劉發鄭俊開北門以降執李庭芝姜

才繫揚州獄

按孫良臣續通鑑綱目作孫青又載胡惟孝而不及劉發鄭俊益史家互有詳略

丙辰阿珠以總管烏瑪喇等守泰州通滁高郵等處相繼來附淮東路得州十六縣三十三戶五十四萬二千六百二十四口一百八萬三千二百一十七以中書右

丞阿爾哈雅為平章政事簽書樞密院事淮東行樞密

院拜奇頁勒密實為中書右丞參知政事董文炳為中  
書左丞淮東左副都元帥達春兩浙大都督范文虎江  
東江西大都督知江州呂師夔淮東淮西左副都元帥  
陳巖並參知政事八月己巳穿武清蒙村漕渠救漢軍  
都元帥庫庫岱李庭將侍衛軍二千人西征乙亥斬宋  
淮東制置使李庭芝都統姜才于揚州市庚辰罷襄陽  
統軍司車駕至自上都遣太常卿托果斯以銅爵一豆  
二獻于太廟以四萬戶總管鄂囉齊參知政事九月壬

辰朔命國師額琳沁作佛事于太廟己亥享于太廟癸卯以平宋赦天下丙午敕常德府歲貢包茅丁未命有司隳沿淮城壘辛酉召宋宗臣鄂州教授趙與熏赴闕

按熏字元史誤票考宋史宗室世系表無名票者惟燕王德昭之後有趙與熏見于元史列傳嘗為鄂州教授即其人也設資戒會于京師阿珠入覲江淮及浙東西

今據改

湖南北等路得府三十七州一百二十八關一監一縣七百三十三戶九百三十七萬四百七十二口千九百七十二萬一千一十五冬十月丁亥兩浙宣撫使焦友

直以臨安經籍圖畫陰陽秘書來上戊子淮西安撫使  
夏貴請入覲乞令其孫貽孫權領宣撫司事從之以淮  
東左副都元帥阿里為平章政事河南等路宣慰使哈  
喇哈斯為中書右丞兵部尚書王儀吏部尚書兼臨安  
府安撫使楊鎮河南河北道提刑按察使密里呼忻並  
參知政事參知政事陳巖行中書省事于淮東十一月  
戊申阿嚙罕克處州旋破建寧府邵武軍癸丑併省內  
外諸司宋主昞航海趨潮州高麗國王王愷遣其臣判

秘書寺朱悅來告更名昤十二月辛酉朔

按辛酉元史誤辛卯據宋

史益廣二

王傳改 以十四年歷日賜高麗戊辰宋主昱次惠州

乙亥定江南所設官府庚寅詔諭浙東西江東西淮東

西湖南北府州軍縣官吏軍民昔以萬戶千戶漁奪其

民致令逃散今悉以人民歸之原籍州縣凡管軍將校

及宋官吏有以勢力奪民田廬產業者俾各歸其主凡

故宋繁冗科差聖節上供經總制錢等百有餘件悉除

免之



十四年春正月癸巳行都元帥府軍次廣東宋知循州  
劉興以城降丙申以江南平免諸路今歲所納絲銀賜  
嗣漢天師張宗演演道靈應沖和真人領江南諸路道  
教甲辰命阿珠選銳軍萬人赴闕丁未知梅州錢榮之  
以城降二月壬戌宋瑞州安撫姚文龍率張文顯來降  
丁卯荆湖北道宣慰使塔海拔歸山寨四十七所戊辰  
祀先農東郊甲戌西川行院布哈率衆至重慶營浮屠  
闕宋都統趙安以城降車駕如上都丁亥宋知南恩州

陳堯道簽判林叔虎以城降以大司農御史大夫宣慰使兼領侍儀司事博囉為樞密副使兼宣徽使領侍儀司事三月辛卯湖廣行中書言廣西二十四郡並已內附議復行中書省于潭州置廣南西路宣撫使于靜江癸巳以行都水監兼行漕運司事乙未福建漳泉二郡蒲壽庚印德傅李珏李公度皆以城降壬寅廣東肇慶府新封等州皆來降乙巳命中外軍民官所佩金銀符以色組繫于肩腋以免褻瀆具為令庚戌建寧府通判

郭纘以城降黃州歸附官吏勝入覲以所部將校于躍等三十一人戰功聞命官之簽書東西川行樞密院事咎順遣同知隆州事趙孟煇齎詔招諭南平軍都掌蠻羅計蠻及鳳凰中壠羅韋高崖等四砦皆降田楊二家承鸞夷民俱遣使納款壬子寶應軍人施福殺其守將降于淮東都元帥府癸丑命汪惟正自東川移鎮鞏昌行中書省承制以閩浙溫處台福泉汀漳劍建寧邵武興化等郡降官各治其郡潭州行省遣使上言廣南西

路慶遠鬱林昭賀藤梧融賓柳象邕廉容貴潯皆降得  
府一州十四以平章政事浙西道宣慰使安塔哈為平  
章政事行中書省事于江淮郡王哈達為平章政事行  
中書省事于北京夏四月甲子宋特磨道將軍農士貴  
知安平州李惟屏知來安州岑從毅等以所屬州縣溪  
洞百四十七戶二十五萬六千來附癸酉省各路轉運  
司事入總管府設鹽轉運司四置權場于碣門黎州與  
吐蕃貿易丙戌禁江南行用銅錢五月癸巳申嚴大都

酒禁犯者籍其家癸卯改廣南西路宣撫司為宣慰司  
廣西欽橫二州改立安撫司各道提刑按察司兼勸農  
事敕江南歸附官三品以上者遣質子一人入侍西番  
長阿里鼎寧濟等三十一族來附得戶四萬七百辛亥  
以河南山東水旱除河泊課乙卯選蒙古漢軍相參宿  
衛六月丙寅涪州安撫陽立及其子嗣榮相繼來附以  
立為夔路安撫使嗣榮為管軍總管丁亥以行省參政  
行江東道宣慰使阿嚶罕為中書左丞行江東道宣慰

使湖北道鄂羅齊參知政事行湖北道宣慰使秋七月  
戊子朔罷大名濟寧印鈔局丁酉敕自今非佩符使臣  
及軍情急速不聽乘傳癸卯諸王錫里濟劫北平王于  
阿里瑪圖之地械繫右丞相安圖誘脅諸王以叛使通  
好于海都海都弗納遂率西道諸王至和琳城北詔右  
丞相巴延率軍往禦之諸王呼嚕岱率其屬來歸與巴  
延軍合丙午置行御史臺于揚州以都元帥姜衛為御  
史大夫戊申東川都元帥張德潤等克涪州擒其安撫

程聰程廣置行中書省于江西以參知政事行江西宣  
慰使達春為右丞參知政事行江西宣慰使敏珠爾丹  
為左丞淮東宣慰使徹爾特穆爾江東宣慰使張滎實  
江西宣慰使李恒招討使頁特密實萬戶實勒們荆湖  
路宣撫使程鵬飛閩廣大都督兵馬招討使蒲壽庚並  
參知政事行江西省事壬子權大都商稅丁巳湖北宣  
慰使調兵攻司空山復壽昌黃州二郡以參知政事行  
江東道宣慰使呂文煥為中書左丞八月戊午朔詔布

哈行院西川辛未車駕畋于上都之北九月丙申廣南  
東路廣連韶德慶惠潮南雄英德等郡皆內附戊申頁  
特密實下邵武軍入福州宋主昷次廣州之淺灣詔達  
春與李恒呂師夔等以步卒入大庾嶺孟古岱索多蒲  
壽庚及元帥劉深等以舟師下海合追宋二王壬子福  
建路宣慰使行征南都元帥索多遣招討使伯嘉努丁  
廣取建寧之崇安等縣及南劍州冬十月丙辰朔日有  
食之己未享于太廟庚申湖北宣慰使塔爾海略地至



夔州之太原坪擒其將誅之乙亥以宋張世傑文天祥  
猶未降命安塔哈選銳兵防遏隆興諸城甲申播州安  
撫使楊邦憲言本族自唐至宋世守此土將五百年昨  
奉旨許令仍舊乞降璽書從之以行省參政呼圖克特  
穆爾托博和囉噶圖崔斌並為中書左丞鄂州總管府  
達嚕噶齊張鼎湖北道宣慰使賈居貞並參知政事十  
一月戊子樞密院臣言宋文天祥與其徒趙孟澐同起  
兵行中書發兵攻之殺孟澐天祥僅以身免詔以其妻

孛赴京師乙未定偽造寶鈔同情者並處死庚子命中書省檄諭中外江南既平宋宜曰亡宋行在宜曰杭州以吏部尚書巴圖爾丹參知政事劉深攻宋主昱于淺灣張世傑奉昱退保秀山十二月丁卯以大都物價翔躑發官廩萬石賑糶貧民庚午梁山軍袁世安以其城及金石城軍民來降乙亥都元帥楊文安攻咸淳府克之以參議中書省事耿仁參知政事冠州及永年縣水免今年田租導任河復民田三千餘頃

十五年春正月辛卯遣喇卜丹將兵戍鄂端己亥禁軍  
民掠賣良家子女丙午萬戶圖們岱爾郝扎拉布哈等  
克瀘州戊申封宋福王趙與芮為平原郡公敕自今御  
史臺毋擅召倉庫吏及究錢穀數二月戊午祀先農令  
蒙古胄子代耕藉田癸亥以咸淳府等郡及良平民戶  
饑賑之壬午索多攻潮州破之置太史院以祭酒許衡  
兼領以參知政事夏貴范文虎陳巖竝為中書左丞黃  
州路宣慰使唐古特史弼竝參知政事三月乙酉詔孟

古岱索多蒲壽庚行省福州鎮撫瀕海諸郡以沿海經  
略副使哈喇岱領舟師南征升經略使兼左副都元帥  
佩虎符甲午西川行樞密院招降重慶等處得府三州  
六軍一監一縣二十柵四十蠻夷司一並招宜勝土恢  
等城田石榴寨相繼來降壬寅以諸路歲比不登免今  
年田租絲銀癸卯都元帥楊文安克紹慶府斬其郡守  
鮮龍乙巳廣南宣慰司招降雷化高三州宋主昱奔硯  
洲夏四月乙卯命元帥劉國傑北征戊午以江南土寇

竊發人心未安遣官分道撫治檢覈錢穀察郡縣災傷  
吏廉能者舉以聞貪殘不勝任者劾罷之甲子以時雨  
霑足稍弛酒禁民之衰疾飲藥者官為醞釀量給之戊

辰宋主昱殂于碣洲廣王曷嗣位辛未置光祿寺以同

知宣徽院事推勒特穆爾為光祿卿丁丑雲南行省招

降臨安白夷和泥分地城寨一百九所

按白夷史誤作  
白衣攷元地理

患白夷為大理土蠻  
八種之一今據改

威楚金齒羅落分地城寨軍民三

萬二千二百戶

按羅落史誤作落落考元地  
理志羅落蠻隸趙州今據改

禿老蠻高

州筠連州等城寨十九所庚辰遣使至杭州等處取在  
官書籍版刻至京師壬午立行中書省于建康府敕自  
今罷免之官宰執為宣慰宣慰為路官路官為州官淮  
浙鹽課直隸行省宣慰司官勿預改北京行省為宣慰  
司五月乙酉定武官承襲制凡主兵官已擢授其舊職  
宜別授有功者勿復以子孫承襲甲午敕諸職官犯罪  
受宣者聞奏受敕者從行臺處治受省劄者按察司治  
之自行中書省以下公務小事限七日中事十五日大

事三十日選江南銳軍為侍衛親軍乙未以烏蒙路隸  
雲南行省六月己未宋主昺徙居厓山丁卯置甘州和  
羅提舉司以備軍餉賑貧民甲戌汰江南冗官乙亥敕  
省院臺諸司奏事必由起居注戊寅全州西延溪洞猺  
蠻二十所內附己卯發蒙古軍千人從江東宣慰使張  
弘範由海道討宋餘衆秋七月壬午朔宋湖南制置張  
烈良提刑劉應龍起兵應厓山阿爾哈雅襲殺之辛亥  
建漢祖天師正一祠於京城八月壬子朔追毀宋故官

所受告身辛未復給漳州安撫使沈世隆家貲仍授本  
路管民總管甲戌安西王相府言川蜀悉平城邑山寨  
洞穴凡八十三其州禮義城等處凡三十三所宜以兵  
鎮守餘悉徹毀從之己卯立提刑按察司于輝和爾分  
地辛巳詔行中書省索多蒲壽庚等曰諸蕃國列居東  
南島砦者皆有慕義之心可因蕃舶諸人宣布朕意誠  
能來朝朕將寵禮之其往來互市各從所欲以中書左  
丞董文炳簽書樞密院事參知政事索多蒲壽庚竝為



中書左丞九月癸未省東西川行樞密院成都潼川重慶利州四處設宣慰司分揀諸路所括軍為民庚寅昭信達嚕噶齊李海拉蘇言願同張弘範取宋二王調漢軍水軍俾將之以中書左丞行江東道宣慰呂文煥為中書右丞冬十月己未享于太廟庚申車駕至自上都已已張弘範統舟師由海道襲漳潮惠三州李恒將步騎由梅嶺襲廣州庚午敕御史臺凡軍官私役軍士者視數多寡定其罪十一月丁亥以辰沅靖鎮遠等郡與

蠻獠接壤民不安業命塔爾海程鵬飛竝為荆湖北道  
宣慰使置司常德路壬辰徵宋相馬廷鸞章鑑赴闕甲  
午敕已除官僚不之任者除名為農辛丑建寧人黃華  
集鹽夫及畬民為亂詔調兵討之丁未行中書省自揚  
州移治杭州立淮東宣慰司于揚州閏月庚戌朔羅氏  
鬼國主阿榨西南蕃主韋昌盛並內附以阿榨韋昌盛  
各為其地安撫使甲子張弘範攻漳州得山寨百五十  
戶百萬餘宋文天祥屯潮陽港先鋒張弘正總管囊嘉

狩率輕騎追及于五坡嶺大敗之執文天祥及其將校

四人赴都

按宋史二王紀天祥被執在十二月與元史異

十二月丙午禁玉泉

山樵採漁弋以海州贛榆縣電傷稼免今年田租會諸

王于大都以平宋所俘寶玉器幣分賜之

十六年春正月癸丑以海南諸郡俱平令阿爾哈雅入

覲辛酉宋合州安撫使王立以城降壬戌分川蜀為四

道以成都等路為川西道廣元等路為川北道重慶等

路為川南道順慶等路為川東道並立宣慰司甲戌張

弘範李恒

李恒據宋史二王紀及續通鑑綱目增

兵至厓山張世傑來拒

戰敗之世傑遁去廣王昺偕其官屬俱赴海死

按二王紀二月

癸未陸秀夫負昺投海中此書在正月甲戌與宋史不符以中書左丞拜奇頁勒密

實同知樞密院事禁中書省文冊奏檢用輝和爾字書

二月戊寅朔祭先農于籍田壬午遣使訪求通皇極數

番陽祝泌子孫其甥傅立將泌書來上癸未建司天臺

于大都又于工都洛陽等五處分置儀表各選監候官

己丑調潭州行省軍五千戍沿海州郡乙未詔湖南行

省於戍軍還塗每四五十里立安樂堂疾者醫之饑者廩之死者藁葬之官給其需遣官覈實癸卯癸嘉定新附軍千人屯田托里貝之地甲辰詔大都河間山東管鹽運司並兼管酒醋商稅等課程命嘉定以西新附軍郡及田楊二家諸貴官子俱充質子入侍車駕如上都三月戊申朔禁歸德亳壽臨淮等處畝獵庚戌敕郭守敬絲上都大都歷河南府抵南海測驗晷景丙寅敕中書省臣凡椽史文移稽緩一日二日者杖三日者死甲

戊潭州行省遣兩淮招討司經歷劉繼昌招下西南諸番以龍方零等為小龍番等處安撫使仍以兵三千戍之命太常寺定州郡社稷制度禮官定祭祀儀式及壇壝祭器圖寫成書名至元州縣社稷通禮以保定路旱減其租夏四月己卯立江西榷茶運司及諸路轉運鹽使宣課提舉司癸巳以給事中兼起居注掌隨朝諸司奏聞事己巳選南軍精銳者充侍衛軍五月己酉中書省請各路設提舉同提舉副提舉各一員專領課程從

之辛亥詔諭漳泉汀邵武等處暨八十四畬官吏軍民  
若能舉衆來降官吏例加遷賞軍民安堵如故以泉州  
經張世傑兵減今年租賦之半乙丑敕江陵等路巴圖  
戶一萬凡千戶置達嚕噶齊一員直隸省部丙寅敕江  
南僧司文移毋輒入遞臨洮鞏昌通安等十驛非有海  
青符不聽乘傳已己詔沿路驛店民家凡往來使臣不  
當乘傳者毋給人畜飲食芻料壬申徙丁子塔所駐侍  
衛軍萬人屯昌平癸酉烏蘭哈達言賦北京西京車

牛俱至可運軍糧帝曰民之艱苦汝等不問但知役民使今年盡取之來歲禾稼何由得種其止之六月丁丑朔詔發新附軍五百人蒙古軍百人漢軍四百人戍碯門魚通黎雅甲申宋張世傑所部將校百五十八人詣瓊雷等州降敕造戰船征日本壬辰以參知政事行河南等路宣慰使呼遜為中書左丞行中書省事癸巳以新附軍二萬分隸六衛屯田以布哈行西川樞密院事總兵入川平宋諸城之未下者仍令東川行樞密院調



兵守釣魚山寨雲南都元帥愛魯克尼雅斯拉昂招降  
西南諸國愛魯克將兵分定亦乞不薛尼雅斯拉昂將  
大理軍抵金齒蒲驃曲蠟緬國界內招忙木巨木禿等  
寨三百籍戶十一萬二百詔定賦租立站遞設衛送軍  
軍還送馴象十二辛丑命樞密院發軍五千京朝官雇  
役千人浚通州運河癸卯以臨洮鞏昌通安等十驛歲  
饑供役繁重有質賣子女以供役者選官撫治之甲辰  
禁巴延徹爾諸峪寨捕獵免四川差稅以參知政事行

中書省事巴圖爾丹為河南等路宣慰使以阿哈瑪特  
子呼遜為潭州行省左丞哈斯哈雅等並復舊職占城  
馬八兒諸國遣使以珍物及象犀各一來獻秋七月乙  
卯置東宮侍衛軍定江南上中路置達嚕噶齊二員下  
路一員丁巳交趾國遣使來貢馴象己未以德古爾穆  
蘇地之蘇默岱城為鎮西府壬戌阿爾哈雅入覲罷潭  
州行省癸酉西南八番羅氏等國來附洞寨凡千六百  
二十有六戶凡十萬一千一百六十有八以中書左丞

行四川行中書省事汪良臣為安西王相以趙州等處  
水旱減今年租八月丁丑車駕至自上都戊子范文虎  
言臣奉詔征討日本比遣周福藥忠與日本僧齋詔往  
諭其國期以來年四月來報待其從否始宜進兵又請  
簡閱舊戰船以充用皆從之海賊賀文達率衆來降已  
丑宋降臣王虎臣陳便宜十七事令張易等議可者行  
之庚寅敕沅州路蒙古軍總管沁達罕征取桐木龍犵  
狓伯洞諸蠻未附者以每歲聖誕節及元辰日禮儀費

用皆歛之民詔天下罷之丁酉以江南所獲玉爵及玷  
凡四十九事納于太廟甲辰詔漢軍出征逃者罪死且  
沒其家置大護國仁王寺總管府九月乙巳朔范文虎  
薦可為守令者三十人詔今後所薦朕自擇之女真碩  
達勒達軍不出征者令隸民籍輸賦庚戌詔行中書省  
左丞呼遜無領杭州等路諸色人匠歲造繒段十萬以  
進戊午王相府言四川宣慰司有籍無軍虛受賞者一  
萬七千八十八人命詰治之議罷漢人之為達魯噶齊

者乙丑以呼巴哩巴爾斯台為都元帥將蒙古軍二千  
人河西軍一千人戍鄂端城冬十月己卯享于太廟乙  
酉帝御香閣命大樂署令完顏椿等隸文武樂辛卯賑  
和州貧民鈔乙未納碧玉爵于太廟辛丑以月直元辰  
命五祖真人李居壽作醮事凡五晝夜壬寅詔皇太子  
燕王參決朝政凡中書省樞密院御史臺及百司之事  
皆先啟後聞十一月戊申敕諸路所捕盜初犯賊多者  
死再犯賊少者從輕罪論壬子遣禮部尚書柴椿偕安

南國使杜中贊齋詔往諭安南國世子陳日烜責其來朝乙卯罷太原平陽西京延安路新簽軍還籍戊辰命湖北道宣慰使劉深教練鄂州漢陽新附水軍詔四川宣慰司括軍民戶數己巳併教坊司入拱衛司十二月戊寅發粟鈔賑監司竈戶之貧者括甘州戶甲申祀太陽丁酉敕自明年正月朔日建醮于長春宮凡七日歲以為例命李居壽告祭新歲詔諭占城國主使來朝建聖壽萬安寺于京城



欽定續通志卷五十九